

Dogri (NSD)

23-04-2026

खबरां

1. तमिलनाडू च विधानसभा चुनाएं दे इक्कले गेढ ते पच्छम बंगाल च दुए गेड लेई अज्ज मतदान कराया गेआ।
2. पच्छम बंगाल च विधानसभा चुनाएं दे दुए गेड लेई प्रचार पूरे जोरें पर।
3. विदेश मंत्री डॉ. एस जयशंकर होरें आखेआ जे भारत अफ्रीका सांझेदारी वैश्विक चुनौतिएं दे चलदे मती महत्वपूर्ण होई गई ऐ।
4. फ्रांस थमां ब्हाई यात्रा करिए आवा'रदे भारती नागरिकें गी ट्रांजिट वीजा दी कोई लोड नेई, आखेआ विदेश मंत्रालय दे प्रवक्ता होरें।
5. सी.बी.एस.ई दे दुए चरण दे म्तेयान अगले म्हीने दी 15 तरीक थमां करोआई जा'रदी ऐ।
6. आई.पी.एल क्रिकेट च मुम्बई इंडियन्स दा मुकाबला चेन्नई सुपर किंग्स कन्नै वानखेड़े स्टेडियम च होग।

<><><><><><>

Polling-WB/TN

अज्ज तमिलनाडू विधानसभा चुनाएं आस्तै वोट पोआए गए। पच्छम बंगाल चुनाएं दे पैहले गेढ आस्तै बी मतदान कराया गेआ। तमिलनाडू च 234 सीटें आस्तै बडुलै 7 बजे मतदान शुरू होआ जेडा शामी 6 बजे तोड़ी चलोग। पच्छम बंगाल च बी 152 सीटें आस्तै वोटिंग होई। तमिलनाडू च 4 ज्हार 23 मेदवार ते पच्छम बंगाल च 1 ज्हार 478 मेदवार चुनां दे मैदान च न जिंदी किस्मत अज्ज ईवीएम च बंद होई गई। वोटें दी गिनतरी असम, केरलम ते पुदुचेरी विधानसभा चुनाएं कन्नै अगले म्हीने दी 4 तरीक गी होग।

<><><><><><>

WB-Campaigning

विधानसभा चुनाएं दे पच्छिम बंगाल च दुए ते अखीरी गेड़ आस्तै प्रचार पूरे जोरें पर ऐ। वरिष्ठ बीजेपी नेता ते प्रधानमंत्री नरेंद्र मोदी होरें कृष्णानगर च जनरैली गी संबोधित कीता। उनें आरोप लाया जे टीएमसी सरकार गैर कनूनी घुसपैठ गी बढ़ावा दिंदी ऐ ते घुसपैठिएं गी गलत कागज पत्रें जरिए बसाने च मदद करदी ऐ। मोदी होरें दावा कीता जे टीएमसी घुसपैठिएं गी सहयोग करने च विश्वास रखदी ऐ। मोदी सरकार सबका साथ सबका विकास धेइयै कन्नै अग्रे बढा'रदी ऐ। तृणमूल कांग्रेस दी मुखिया ते पच्छिम बंगाल दी मुखमंत्री ममता बनर्जी होरें चोरिंघी ते जाधवपुर च जनरैलिएं गी संबोधित कीता।

<><><><><><>

Maharashtra Bypolls

महाराष्ट्र ते गुजरात च अज्ज उपचुनाएं आस्तै मतदान होआ। महाराष्ट्र च बारामती ते राहुड़ी च ते गुजरात च उमेरठ च वोट पोआए गए। वरिष्ठ एनसीपी नेता ते बारामती विधायक अजीत पवार ते राहुड़ी थमां बीजेप विधायक शिवाजीराओ करदिले हुंदे काल होने करी उपचुना कराने पे। बारामती च एनसीपी प्रत्याशी सुनेत्रा पवार, पार्थ पवार ते विधायक रोहित पवार सने कई वरिष्ठ नेताएं अपने मताधिकार दा इस्तेमाल कीता। पिछले बरे शिवाजी करदिले उंदे काल दे बाद राहुड़ी सीट खाली होई गई ही। उंदे पुत्र अक्षय करदिले होर बी चुना लड़ारदे ना। उंदे मुकाबले च एनसीपी मेदवार गोविंद मोकटे ते वंचित बहुजन अधाड़ी दे संतोश चालके होर ना।

<><><><><><>

Goyal- Qatari

उद्योग ते वाणिज्य मंत्री पीयूष गोयल होरें अज्ज वर्चुअल ढंगै कन्नै कतर दे विदेशी बपार मामलें दे राज्यमंत्री डॉ. अहमद बिन मोहम्मद अल सईद कन्नै गल्लबात कीती। इक सोशल मीडिया पोस्ट च गोयल होरें आखेआ जे दवें धड़े दपक्खी बपार ते निवेश सरबन्धी गठजोड़ बधाने बारै चर्चा कीती। मंत्री होरें आखेआ जे उनेंगी भारत ते कतर बश्कार आने आले वक्त च रणनीतिक सांझेदारी बढने दी मेद ऐ।

<><><><><><>

Prez. Artists

राष्ट्रपति द्रोपदी मुर्मू होर रिवायती कला दे बक्ख-बक्ख शैलिएं कन्नै जुड़े दे कलाकारें दे इक समूह कन्नै राष्ट्रपति भवन च मिलियां ते उंदी कलाकारी गी दिक्खेआ। बक्ख-बक्ख शैलिएं जियां कावी, निर्मल, माता नी पछेड़ी त गोंड पर कम्म करा'रदे 13 कलाकार आर्टिस्ट इंड रेजीडेंस कार्यक्रम हेठ राष्ट्रपति भवन च रूके दे न। भारत दी कलात्मक रिवायतें ते जज्बे गी जींदा रखने ते सांस्कृतिक पंछान गी जींदा रखदे होई भविक्ख दी नस्तै गी इंदे बारै अवगत कराने दे मकसद कन्नै एहू कार्यक्रम आयोजित कीता गेआ ऐ।

<><><><><><>

EAM-Summit

विदेश मंत्री डॉ. एस. जयशंकर होरें आखेआ जे भारत-अफ्रीका सांझेदारी दुनिया दे भू-राजनीतिक चुनौतिएं दे चलदे मती महत्वपूर्ण बनी गई ऐ। उनें अज्ज आखेआ जे भारत दी विदेशी नीति च अफ्रीका दी मुख्ब थाह ऐ ते भारत ते पिछले किश बरें च अफ्रीका च अपनी कूटनीतिक छाप छोड़ी ऐ। विदेश मंत्री होरें एहू इंडिया अफ्रीका फोरम समिट दे लोगो, थीम यानि विशेषार ते वेबसाइट दा शुभारम्भ करदे होई आखी। सम्मेलन अगले महीने दी 28 थमां 31 तरीक चलोग। डॉ. एस जयशंकर होरें आखेआ जे पूरे महाद्वीप च 17 नमें कूटनीतिक मिशन शुरू कीते गए न जेदे कन्नै मिशनें दी गिनतरी 45 पुज्जी गई ऐ।

<><><><><><>

France Visa Free Transit

भारत नै फेंच ब्हाई अड्डे थमां आवा'रदे भारतीयें आस्तै वीजा फ्री ट्रांजिट गी शुरू करने दी घोशणा दा सोआगत कीता ऐ। नमीं दिल्ली च मीडिया गी जानकारी दिंदे होई विदेशी मामलें दे मंत्रालय दे प्रवक्ता रंधीर जास्वाल होरें आखेआ जे भारती पासपोर्ट धारकें आस्तै ट्रांजिट वीजा दी जरूरत गी हटाने आस्तै प्रधानमंत्री नरेंद्र मोदी ते फ्रांस दे राष्ट्रपति इमैनुअल मैक्रों हुंदे बश्कार इस बरे फरवरी च मुम्बई च बैठक होई ही। इस घोशणा पर अमलावरी 10 फरवरी दा शुरू ऐ। जायसवाल होरें आखेआ जे इस फैसले कन्नै भारत-फ्रांस दी बददी सांझेदारी दा पता लगदा ऐ जेड़ी खास वैश्विक रणनीतिक सांझेदारी धोड़ी पुज्जी गई ऐ।

<><><><><><>

BJP-Congress

बीजेपी दे प्रवक्ता शाहनवाज हुसैन होरें अज्ज आखेआ जे प्रधानमंत्री नरेंद्र मोदी हुंदे खलाफ कांग्रेस अध्यक्ष मल्लिकार्जुन खड़गे हुंदे आसेआ कथित टिप्पणी करना कांग्रेस गी भारी पौगा। उनें जोड़ेआ जे खड़गे हुंदी टिप्पणी कन्नै छड़ी प्रधानमंत्री हुंदी नेई, सगुआं पूरे देश दी बेज्जती होई ऐ। हुसैन होरें दस्सेआ जे चुना आयोग नै बी खड़गे होरें'गी नोटिस जारी कीता ऐ ते आयोग गी अपील कीती ऐ जे उंदे खिलाफ सख्त कार्रवाई कीती जा।

<><><><><><>

UP-Accident

उत्तर प्रदेश, मिरजापुर च बरखा गुमान बायसोड बेले हिल दे कोल मती सारी गड्डिएं दी टक्कर होने करी 4 न्याणें सने 11 लोकें दी मौत होई गई ऐ। एह हादसा द्रामांदगंज च कल रातीं पेश आया। मिरजापुर एस.पी अर्पना रजत कोशिक होरें आखेआ जे इक ट्रक दी टक्कर इक्क कार, इक एसयूपी, इक ट्रेलर कन्नै होई जेदे मगरा एसयूवी ते कार च अगग लग्गी गई। पुलिस नै जांच शुरू करी दिती ऐ ते मरनें आहलें दी शिनाख्त जारी ऐ। राष्ट्रपति द्रोपदी मुर्मू, उपराष्ट्रपति सी.पी राधाकृष्णन ते प्रधानमंत्री नरेंद्र मोदी होरें इस हादसे च होए दे जानी नुकसान पर दुख जाहिर कीता ऐ। प्रधानमंत्री मोदी होरें मरने आहलें दे परिवार आस्तै प्रधानमंत्री राश्ट्री राहत कोष थमां दो-दो लक्ख रपे देने दी घोशणा कीती ऐ ते जखिमयें गी 50-50 ज्हार रपे दित्ते जांगन।

<><><><><><>

IMD-Weather

भारती मौसम विभाग नै दिल्ली, छत्तीसगढ़, हरियाणा, चंडीगढ़, मध्य प्रदेश, पंजाब, राजस्थान, उत्तर प्रदेश ते विदर्भ च अगले दो दिनें धोड़ी गर्मी पौने दी पेशगोई कीती ऐ। विभाग नै तटीय आंध्र प्रदेश, गंगीय पच्छिम बंगाल, गुजरात, केरलम, माहे, तमिलनाडू, पुदुचेरी ते कराईकल च गर्मी ते उमस बढने दी मेद जताई ऐ।

<><><><><><>

Weather

मौसम विभाग आसेआ दिती गेदी जानकारी मुजब जम्मू-कश्मीर च अप्रैल महीने दे अखीरै धोड़ी मौसम आमतौरा पर खुशक रौहग- उआं किश टांवी-टांवी थाहरें पर हल्की कन्नी-कनोत होई सकदी ऐ। अज्ज ते कल तापमान सामान्य कोला 4 डिग्री तगर उप्पर जाई सकदा ऐ। उआं 24 कोला 25 अप्रैल तोड़ी जम्मू खित्ते च केई थाहरें अंधी-झक्खड़ झुल्लने ते हल्की बरखा दे बी असार ना। ओहदे बाद 26 कोला लेइयै 28 अप्रैल तगर मौसम परतियै खुशक बने दा रौहग ते मगरा 29 ते 30 अप्रैल गी किश टांवी-टांवी थाहरें हलके कोला दरम्याने दर्जी दी बरखा दे असार दस्से गे ना।

<><><><><><>

PM-Moderinization

प्रधानमंत्री नरेंद्र मोदी होरें आखेआ जे रेल पटरियें दे आधुनिकीकरण कन्नै इक तेज ते मता भरोसेमंद नेटवर्क बना'रदा ऐ। अक अंग्रेजी दैनिक च रेल मंत्रीद अश्विनी वैशणव हुंदे आसेआ लिखित लेख गी सोशल मीडिया पर सांझा करदे होई मोदी होरें आखेआ जे पटरिएं दे नवीनीकरण, उन्नत सिखलाई ते मशीनीकृत रख-रखाव कन्नै जात्तरा दी गुणवत्ता च सुधार होआ ऐ ते गति च बाद्दा यकीनी होआ ऐ। उनें आखेआ जे इनें बदलावें च चिर घट्ट होआ'रदा ऐ, यात्रा सौखी होआ'रदी ऐ ते रेलवे मुख्य भरै च यात्रिएं दी गिनतरी च बाद्दा ते माल-दुलाई दी मंग गी पूरा करने च सक्षम होआ'रदा ऐ।

<><><><><><>

Badrinath

उत्तराखंड दे चमोली जिले च अज्ज बड्डुलै पूरे रीति रिवाजें कन्नै बद्रीनाथ धाम दे कपाट खुल्ली गए। मंदर गी शैल सुंदर तरीके कन्नै फुल्लें कन्नै सजाया गेदा हा ते सुरक्षा दे व्यापक इंतजाम कीते गए हे। उत्तराखंड दे मुख्मन्त्री पुष्कर सिंह धामी होरें आखेआ जे बद्रीनाथ धाम दे कपाट खुल्लने दे कन्नै गै चार धाम जात्तरा शुरू होई गेई ऐ। केदारनाथ धाम दे कपाट कल खोले गए हे। प्रधानमंत्री नरेंद्र मोदी हुंदे नां पर मुख्मन्त्री पुष्कर सिंह धामी होरें महाभिशेक पूजा कीती ते मुख्मन्त्री भलाई-बेहतरी दी कामना कीती। मुख्मन्त्री होरें जात्तरा लेई कीते गेदे इंतजामें दा जायजा लैता ते आखेआ जे सारे लोड्चदे इंतजाम कीते गए न तां जे जात्तरा गी सुरक्षित ते सुचारू ढंगै सिर करोआया जाई सकै।

<><><><><><>

CBSE-Exam

केंद्री माध्यमिक शिक्षा बोर्ड सी.बी.एस.ई 10मीं जमात दे म्तेयान 2026 दा दुआ गेड 15 मई थमां आयोजित करोग। एह परीक्षा वैकल्पिक ऐ ते जेडे विद्यार्थी पैहले गेड च हासिल अंक सुधारना चाहंदे न ओह इसी देई सकदे न। सारे पास विद्यार्थी विज्ञान, गणित, सामाजिक, विज्ञान ते भाशाएं चा कुसै त्रे विशें च अपना प्रदर्शन बेहतर करने लेई म्तेयान देई सकदे न। बोर्ड नै 10मीं आस्तै पैहली मुख्ख परीक्षा दे नतीजें 15 अप्रैल गी घोशित कीते हे। एह पैहल राश्ट्री शिक्षा नीति 2020 दे मूजब ऐ।

<><><><><><>

IPL Cricket

अज्ज शामी मुम्बई च चेन्नई सुपर किंग्स दा मुकाबला मुम्बई इंडियन्स कन्नै होग। मैच संजा साड्डे 7 बजे शुरु होग। IPL क्रिकेट च राजस्थान रॉयल्स नै कल रातीं लखनऊ सुपर जायंट्स गी 40 रन्ज कन्नै रहाई दिता। 160 रन्ज दे लक्ष दा पिच्छा करदे होई लखनऊ दी टीम 18 ओवरें च छडी 119 रन्ज गै बनाई सकी। लखनऊ सुपर जायंट्स नै टॉस जितियै पैहले गेंदबाजी करने दा फैसला लैता हा। पैहले बल्लेबाजी करदे होई राजस्थान रॉयल्स नै 20एं ओवरें च 6एं विकेटें दे नुक्सान पर 159 रन्ज बनाए। खराब बल्लेबाजी दे बावजूद 7 मैचें थमां 10 अंक हासल करियै- इस जित्त कन्नै राजस्थान रॉयल्स दी टीम दुई थाहरै पर पुज्जी चुकी दी ऐ। उप्परोतली चौथी बारी हार दा सामना करने दे बाद लखनऊ सुपर जायंट्स 9में नम्बरै पर ऐ। रवीन्द्र जडेजा गी प्लेयर ऑफ दा मैच घोषित कीता गया।

<><><><><><>

Crackdown-Drug

नशा तस्करें दे खलाफ इक बड्डी कार्रवाई गी अंजाम दिंदे होई पुलस ते जिला प्रशासन दी इक सांझी टीम नै नरवाल इलाके दे राजीव नगर च इक बड्ठा अभियान चलाइयै नशे दे कारोबार थमां हासल पैसे कन्नै बनाई गेदी गैर कनूनी संपत्तिएं गी ढहाई दिता ऐ। जम्मू साउथ दे एसडीएम मनु हंसा हुंदे निर्देशें पर कार्रवाई करदे होई इस अभियान तैहत 3 गैर कनूनी मकानें गी तबाह कीता गेआ ऐ। अधिकारिए मूजब एह त्रवें मकान नशे दे गैर कनूनी धंधे दी कमाई कन्नै बनाए गेदे हे। इस कार्रवाई दे दरान जम्मू-कश्मीर पुलस दिआं टीमां उत्थे मजूद हिआं।

<><><><><><>

LG-Vidyamandir

लेफ्टिनेंट गवर्नर मनोज सिन्हा होरें अज्ज नगरोट्टा च स्वामी प्रणवानंद विद्या मंदर दी नमीं स्कूली ईमारत दा उद्घाटन कीता। इस मौके पर बोलदे होई एल.जी सिन्हा होरें विद्यार्थीएं ते अध्यापकें गी गुजारश कीती जे ओहू राष्ट्र निर्माण च जोगदान देने दे कन्नोकन्नी अज्जै दे बदलदे वैश्विक म्हौल स्थाबै क्लासें गी बदलने ते भारत गी दुनिया दी इक अगुआ ज्ञान आधारित अर्थ बवस्था बनाने च बी टकोह्दी भूमिका निभान। उनें आखेआ जे असेंगी विद्यार्थीएं अंदर सांस्कृतिक जागरूकता गी मजबूत करना होग गी मजबूत करना होग कीजे अनेकता च एकता गै आलमी सतह दे समाज गी परिभाषित करदी ऐ। एल.जी होरें विद्यार्थीएं गी साफ ते स्पष्ट ढंगै नै अपनी गल्ल आखने लेई गल्लबात आले कौशल गी बढ़ावा देने दी अपील कीती तां जे नमीं पीढ़ी जिंदगी बेहतर बनाने दे कन्नोकन्नी लोकतांत्रिक मुल्लें-कदरें गी बी बरकरार रक्खे ते इक खुशहाल जम्मू-कश्मीर दे निर्माण लेई रलियै कम्म बी करै। श्री सिन्हा होरें अज्ज नगरोट्टा दे धम्मी इलाके च स्थित सर्व शक्ति चंडी माता मंदरै दे स्थापना दिवस आले कार्यक्रमै च हिस्सा लैता। इस मौके पर उनें मंदरै च मत्था टेकेआ ते सबनें लेई रमानदारी, खुशहाली ते कल्याण दी कामना कीती।

<><><><><><>

PUC- No Fuel

दिल्ली सरकारै ब्हाऊ दे प्रदूषण दे कारणें गी घट्ट करने दे अपने जतनें गी जारी रखदे होई इक होर महत्वपूर्ण फैसला लैता ऐ- जेहदे मुजब कुसै बी गड्डी जेहदे कश वैध प्रदूषण नियंत्रण सर्टिफिकेट यानि P.U.C नैई होग- उसी पम्पें पर पट्रोल- डीजल- सी.एन.जी जां एल.पी.जी नैई दिता जाहगा। जारी नमें दिशा-निर्देशें मुजब पेट्रोल पम्पें पर ईंधन छड़ी उनें गड्डियें गी गै दिता जाहग- जिंदे कश पलूशन सर्टिफिकेट होग। इस बारे सभनें पट्रोल पम्पें ते सी.एन.जी स्टेशनें गी निर्देश जारी कीते न कि हुकमै दी पूरी संजीदगी कन्नै पालमा कीती जा ते जेहड़ा कोई बी इस हुकमै दी अनदिक्खी करदा पाया गेआ- ओहदे खलाफ सख्त कारवाई कीती जाहगा।

<><><><><><>